

Cwestiynau cyffredin i rieni yn yr ardaloedd peilot

Beth yw'r cynnis gofal plant? Bydd y cynnis gofal plant newydd yn darparu cyfanswm cyfunol o 30 awr o addysg gynnar a gofal plant am gyfnod o hyd at 48 wythnos y flwyddyn ar gyfer plant 3 a 4 oed i rieni cymwys sy'n gweithio. Rydym yn rhedeg cynllun peilot ar y cynnis hwn mewn rhai ardaloedd ar hyn o bryd.

Beth y mae'n ei olygu i mi fel riant? Os oes gennych chi blentyn sy'n 3 neu'n 4 oed, mae hawl gennych i gael o leiaf deng awr yr wythnos o addysg gynnar (sy'n cael ei adnabod hefyd fel Meithrin Cyfnod Sylfaen) i'ch plentyn yn ystod tymhorau ysgol. Os ydych chi'n gweithio, ac rydych yn byw yn un o'r ardaloedd peilot, gallech chi gael oriau ychwanegol o ofal plant wedi'u hariannu gan y Llywodraeth hefyd, fel eich bod yn cael cyfanswm o 30 awr o ofal plant ac addysg gynnar yr wythnos am gyfnod o hyd at 48 wythnos y flwyddyn.. Mae'r 48 wythnos yn cynnwys 39 wythnos o ddarpariaeth gyfunol o addysg a gofal plant yn ystod tymhorau ysgol a 9 wythnos o ddarpariaeth 'adeg gwyliau' y tu allan i dymhorau ysgol. Bryd hynny, hawl i gael hyd at 30 awr o ofal plant sydd gennych.

Beth yw addysg gynnar? Mae hawl gan bob plentyn i gael **addysg gynnar** (Meithrin Cyfnod Sylfaen) o'r tymor ar ôl ei ben-blwydd yn 3 oed. Mae pob awdurdod lleol yn darparu isafswm o 10 awr o addysg gynnar yr wythnos, naill yn yr ysgol leol neu mewn lleoliad fel grŵp chwarae, meithrinfa ddydd neu Gylch Meithrin. Yn ystod y tymor ysgol, bydd yr addysg gynnar yma yn rhan o 30 awr y cynnis gofal plant. Yn ystod gwyliau ysgol, pan nad oes addysg gynnar, bydd y cynnis yn rhoi 30 awr o ofal plant i rieni cymwys am gyfnod o hyd at 9 wythnos. Gall eich Gwasanaeth Gwybodaeth i Deuluoedd Lleol eich helpu i ddarganfod darpariaeth cofrestredig sy'n ateb eich gofynion. I gael gwybodaeth ynghylch y Cyfnod Sylfaen cliciwch [yma](#) neu chwiliwch am Meithrin Cyfnod Sylfaen ar dudalennau gwe Llywodraeth Cymru.

Sut y byddaf yn gwybod a ydw i'n gymwys? Mae rhieni plant 3 a 4 oed yn gallu manteisio ar yr hawl i gael addysg gynnar. Rydych chi'n gymwys i gael y gofal plant ychwanegol os ydych chi'n byw yn ardal y cynllun peilot, os oes gennych blentyn o fewn yr ystod oedran, a'ch bod yn ennill ar gyfartaledd isafswm wythnosol cyfwerth ag 16 awr neu ragor ar isafswm cyflog cenedlaethol neu ar gyflog byw cenedlaethol ond llai na £100,000 y flwyddyn. Os yr ydych yn deulu unig riant bydd yn rhaid i chi fod mewn gwaith a mewn teulu dau riant, mae angen i'r ddau ohonoch fod yn gweithio. Os yr ydych yn hunangyflogedig neu ar gontract dim oriau bydd disgwyl ichi brofi hyn drwy gyflwyno dogfennau perthnasol. Mae'n bosibl bod rhieni maeth a gofalwyr sy'n berthnasau yn gymwys hefyd. Cysylltwch â'ch Gwasanaeth Gwybodaeth i Deuluoedd i gael rhagor o wybodaeth.

Pa ardaloedd yw'r ardaloedd peilot? Maent mewn ardaloedd awdurdodau lleol dynodedig. Mae rhestr lawn ohonynt ar ein [gwefan](#) neu ar wefan eich awdurdod lleol.. Mae angen ardaloedd peilot arnom er mwyn profi'r cynnis i wneud yn siŵr ei fod yn gweithio i blant, i rieni ac i ddarparwyr, ond bydd y cynnis ar gael ledled Cymru o fis Medi 2020.

Ga i ddewis unrhyw ddarparwr gofal plant? Gallwch, ar yr amod bod y darparwr hwnnw yn hapus i fod yn rhan o'r cynnig a'i fod wedi ei gofrestru ag AGC (AGGCC gynt) neu â'r Swyddfa Safonau mewn Addysg (yr arolygiaethau ar gyfer lleoliadau gofal plant). Gallant wneud hynny drwy gysylltu â'r Gwasanaeth Gwybodaeth i Deuluoedd Lleol. Gall y darparwyr gofal plant fod wedi eu lleoli y tu allan i'ch ardal beilot, y tu allan i'ch sir, neu fod yn Lloegr hyd yn oed, os ydych chi'n byw ar y ffin. Nid oes unrhyw gyfyngiad o ran pa bryd y gallwch ddefnyddio'r oriau gofal plant ychwanegol, ond eich cyfrifoldeb chi yw dod o hyd i ddarparwr gofal plant sy'n addas i anghenion eich teulu chi. Gall y Gwasanaeth Gwybodaeth i Deuluoedd eich helpu drwy ddarparu gwybodaeth ar yr holl leoliadau gofal plant.

Beth os oes gan fy mhlentyn anghenion ychwanegol? Mae'r cynnig ar gael i bob rhiant cymwys, ond efallai y byddwch chi a/neu eich darparwr yn dymuno cysylltu â'ch awdurdod lleol ac fe ddylai allu rhoi cyngor i chi a manylion unrhyw gefnogaeth ychwanegol sydd ar gael.

Fydd angen imi dalu am unrhyw beth? Mae'r cynnig gofal plant yn cyllido uchafswm o 30 awr o addysg gynnar a gofal plant yr wythnos. Mae'r arian gan y Llywodraeth ar gyfer yr addysg a'r gofal y mae'r gweithwyr proffesiynol yn y lleoliad yn eu darparu. Nid yw'n cynnwys bwyd, cludiant na gweithgareddau oddi ar y safle sy'n gofyn am dâl ychwanegol, a bydd eich darparwr yn gallu codi tâl arnoch chi am y pethau hyn. Bydd y costau cludiant yn ddibynnol ar leoliad eich cartref a pha mor bell y mae angen iddynt deithio, Ni ddylai darparwyr godi mwy na £7.50 y diwrnod am fwyd neu £4.75 am hanner diwrnod (yn cynnwys cinio).

Oes rhaid imi ddefnyddio'r 30 awr yr wythnos yn llwyr? Nac oes. Chi sy'n dewis faint o'r 30 awr yr ydych chi am eu defnyddio. Fodd bynnag, os na fyddwch chi'n defnyddio pob un o'r 30 awr mewn wythnos, ni allwch chi ddefnyddio'r oriau sy'n weddill mewn wythnos arall. Ni allwch gyfnewid oriau addysg am oriau gofal plant, nac oriau gofal plant am oriau addysg. Gallwch chi dalu am oriau ychwanegol o ofal plant eich hun yn seiliedig ar gontract preifat rhyngoch chi a'ch darparwr gofal plant.

Sut ydw i'n gwneud cais? Os ydych chi'n byw mewn ardal beilot gallwch wneud cais am y cynnig, gan gynnwys y lle addysg gynnar y mae hawl gennych ei gael, drwy eich awdurdod lleol. Os nad ydych yn byw mewn ardal beilot, neu os nad ydych yn gymwys i gael yr oriau ychwanegol o ofal plant, gallwch wneud cais am eich lle addysg gynnar drwy eich awdurdod lleol. Cysylltwch â'ch Gwasanaeth Gwybodaeth i Deuluoedd i gael rhagor o wybodaeth.

